

**■ GLOSSA**

# Jau. Mainascola

DA SILVIO CAMENISCH

Jau sun il mainascola. Ves ins da lunsch, dattiers i ves'ins pir da dretg e mai salida sut mesira, jau manegel sur mesira. Dattan ils ins chau e tgil, dattan ils auters tgil e chau, qua na guardain nus betg uschè ferm sin la successiun, là en las lecziuns che nus visitain puspè bain. Relevant, matschentscheidend, è ch'i vegn salidà sco quai ch'igl è gist e duaivel visavi la persuna da respect. Jau. Il mainascola. Ils litgatgils, els na fan betg explicit ed implicit ord inclinaziuns bassas, ston savair ch'els survegnan cuntut in minus en noss giudicament da collavuratur, mussan els cun lur litgim e tglim totala submitsiun. Jau na dovr betg chauns tglulants. Personalitads.

Mument. È quai er stà als collegas per suenter? Cun tantas rasadas palpiri na vesas betg pli las maisas. Jau sun dà da stgala si, e tgenina! Serrà giu cun il master da manader da scola cun summa cum laude, s'accorsch'ins bain sch'ins survegn da far cun mai. La scola da qualitat, jau manegel i dependa absolut dal managment e da las cumpetenzas dal Suprim, e quai sun jau, dovra manaders spiertals. En fracziuns pitschnas, sco schain Vrin u Vnà, sorry!, tanscha fin quest onn da scola in manader. In auter onn dovri in, dus spiritus rector, era sche la scola cumplessiva funcziunass senza. Anoravers stuain nus mussar ch'ella funcziuna mo uschia, la scola futura da qualitat.

I ns chatta mai crudà da stgala si, hai jau ditg, si



en il biro dal chef. Mintgatant sun jau là, mintgatant puspè betg là. I vegn lavurà perquai tuttina. Jau fatsch plunas visitas tar mes collavuratur, en pertschients novanta pertschient dunnas. I na disturba betg nus, sch'ellas èn bunas. Temp istoric ch'ellas ston esser meglras per esser tuttina bunas per pudair tanscher l'aua a nus. Ellas san, ston betg esser explicit la manadra da scola. Il stil da manar ils collegas dastga sa differenziar da noss stil. Fa nagut. Il stil vegn respectà e ludà anoravers, anenvers na sun jau betg uschè segir, egal da tgi ch'el vegn, co ch'el vegn e cu ch'el vegn. Mo ch'insatgi vegn. Nagina tema u perfin panica, insatgi vegn a vegnir. Igl è empermess. A tshella fermata èsi il Godot, a quella il Mainascola. Sun jau.

Fiss jau qua, a noss discurs da collavuratur. Jau hai guardà trais lecziuns, ina avain nus preannunzià, las autras betg pli. Sco vegl collega dattiers da la pensiun has experienzas ch'ils giuvens n'han betg, fas gea bunamain tut endretg. Tuttina hai jau vis mancanzas: en l'adiever da medias, decoraziuns da la stanza, coaching dals uffants, stil conservativ etc.

Jau ves che ti ès emoziunal, il mintun tut che trembla. Per tia quietezza: Er Federer dat in stil conservativ cumpareglia cun newcomer. Jau, voss mainascola, sto esser sever, autramain cartessan ils vegls satgs dad esser naschids maisters, e dastgan savair ch'ins sa emprender vitiers fin la davos'ura. Chapesch jau betg! Dapi bunamain quaranta onns dumagnà tuts ch'han merità! en las scolas successivas: secundara, gimnasi, uni ed uss in trist C nunsuffizient tut en tut! Per saldo vul quai dir schliet scolast! Sun betg tup! Anc realisesch jau mes denturn. Noch spüre ich mich. È gea vair.

I ns i sa vesair uschia. Nus stuain schon vesair che bunamain nagin è mister perfect, e ch'il mainascola vesa insatge uschia cur ch'el vegn. Las datas na vegnan betg publicas, n'han er nagin'influenza sin la paja. Vegn pir, schon aufgegleist, sco nus schain sin bun romontsch da Pro Idioms. Las datas da ti'acta X stattan tar mai, vegnan dadas vinavant cun la pensiun, per mauns dal manader da la chasa da vegls e tgira. Quai sto jau dir sin tudestg: Dort kommen sie wieder zum tragen.